

15

T 3210/1432, F3

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 10 1941

平湖縣志卷九

中

哈佛大學漢和圖書館珍藏印

平湖縣知縣候補同知王恒修

人物

道學 文苑

行詣 孝友

方技 尚義

僑寓

道學

按宋史割道學傳所以尊程朱諸子也邑陸清獻遠宗洙泗近紹洛閩

國朝以來百有餘年從祀兩廡者海內一人而已仿宋史例特作道學傳以別于列傳諸人云

國朝

陸隴其陸子年譜纂初名龍其

按陸氏靖獻支譜初名世璣

字稼書居泖

上世有隱德幼讀書躬行實踐以聖賢為己任年四十一登

康熙庚戌進士乙卯授江南嘉定知縣嘉定為瀕海大邑號

稱難治俗尚奢侈民多積逋令率坐是落職隴其至嘆曰民

不輸賦大率以貧也其所以貧風俗爲之也譬如少年以遊冶傷其元氣力不能服勞爲父兄者禁其遊冶則元氣自復不禁而予以飲食抑末矣今且不爲飲食而又督過之則官與民俱病固其所耳故其爲治一以鋤豪強抑胥吏禁侈靡變風俗爲主大賈汪氏者素橫行邑中其僕奪賣薪者妻汪匿僕急捕治之以妻還賣薪者而重懲其僕汪大恐令所識探意隴其曰人無不可自新苟爲善卽善矣若平日所爲吾知之毋犯我自新未晚汪感懼卒爲善士市少年十百爲朋以拳勇爭豪鄉黨畏苦之隴其廉得其名不卽捕遇有控者責而械諸門時時勸諭之視其情色果悔則釋不匝月其黨

悉解散民有告其子不孝者卽涕泣自訟曰我德薄無以化汝令汝父子至此委曲曉諭踰時其父泣其子亦汪然出涕已而察其深悔乃慰遣之并不與杖大塲鎮有兄貧貸于弟不應輒舁弟貲以去弟賄巡檢以盜報則怒曰是可以爲盜乎訊之乃其弟婦翁所爲痛懲之因呼其弟曰彼兄也乃聽婦翁謂兄盜不悌也笞之又呼其兄曰汝爲長不自思謀生之策而貸弟弟不應而徑取之陷汝弟不悌是汝不友也亦笞之或感服而退宦家子有罪延其父至堂上而責之曰我與爾交朋友也爾猶子也子弟而不肖不可以不責竟杖之邑胥役以干計惟輸解上官乃遣役絕不令至民間民亦信

其愛已不待役至賦稅先期畢集未幾胥役易業自去者過半其存者亦相率告哀曰某等知公清慎豈敢有所覬但工食已裁革無所得食業受役不可脫脫亦莫肯代惟公哀之隴其惻然曰若亦我民也然無術救汝無已令汝曹得更代如何皆歡然曰如是則生矣乃悉爲農賈以自給當直則來于是屬有存者期年政成丙辰冬福建按察使員缺

上命九卿會推天下賢能愛民之官將不次擢用尚書魏象樞舉隴

其而是時江蘇巡撫慕天顏方以隴其儒術迂疎非肆應才具疏入告部議引才力不及例降級調用嘉民大駭罷市日號軍門天顏不自安爲具疏請復而部議又引諱盜例落職

先是民張與汪以小隙訐訟汪遇盜被傷歸謂其弟曰張遣殺我其弟遂以讎殺控隴其疑小隙無殺理而察張亦非殺人者因以是盜是讎未敢遽定報尋獲盜七人讞上部議以隴其初詞涉諱匿引例罷斥人謂隴其盍辨諸隴其曰邑有盜長吏固宜有罪且夜半殺人于路果讎亦盜也而我不能斷議黜不枉奚辨爲嘉民益大駭去之日九鄉二十都民夜半羣呼入邑填滿街衢哭聲震天地及入邸舍男婦萬餘環泣不去者終夜次日四郊各刻木爲位旬日間村各立祠旌幢鼓吹爭迎位于其中旣歸行李蕭然惟書數卷及其妻織具而已故民謠曰陸公歸舟何所裝圖書數卷機一張戊午

詔舉博學鴻辭之士郡人工部主事吳源起薦入都會左都御史魏象樞疏論前部議之非

上心領之未幾以憂歸服闋象樞復上疏薦奉

旨復職癸亥補靈壽知縣既之官視其邑逼近畿輔多徭役地磽瘠水旱頻仍俗强悍善鬪少訟而輕生嘆曰民富而後可以教輕生之習禁令尤嚴然未盡絕者民貧而不知義也嘉定可使富而不及爲靈邑又非嘉定比奈何力言于上官非大恤民力不可時派運灰車靈邑以五輛視他邑獨多前令董子祁爭之不得民以病告隴其首以爲請至以去就爭乃得更代邑又北負太行南濱滹沱多不毛之土順治康熙間兩奉

詔盡蠲其徵後言者復申隱地處分例有司畏罪稍稍首報由是倚

山瀕河之地間可耕獲者相戒不敢墾隴其下令民墾謂

朝廷決不與爾民爭此毫末之利地方官苟非大貪惡決不勒

爾起科以貽爾無窮之害民乃漸有關者終任七年竟無一畝首報邑額丁萬五千有奇前令編審率增丁逃亡死絕不除而攤派包賠日甚隴其謂如是是驅之逃也因以實額報且曰裕國之道惟在恤民逃亡日少則國課日增若目前形勢恐難就筋疲力盡之民責其無缺額也庚午歲大饑奉

詔發粟賑民裹糧驅馳山谷間審其衆寡老弱躬自徧給及去民懷其德如在嘉定時初江南總督于成龍卒

上臨朝問九卿今天下清操如于成龍者有幾人九卿頓首以七人對隴其與焉

上又嘗問兵部侍郎李光地曰今天下亦有留心性命之學者乎對曰臣所知者有山東布政使衛旣齊靈壽知縣陸隴其臣曾見隴其所著書皆有本之學

上又問隴其居官何如對曰清廉愛民屢經大臣薦舉至是左都御史陳廷敬復薦有

詔行取來京擢四川道御史遂上疏言畿輔民情畿輔民情疏臣本外吏荷蒙

皇上拔置臺班苟有一得之愚皆當次第敷陳以仰佐聖治之萬一顧臣官畿輔者久知畿輔之民情敢先為皇上陳之畿輔邊山一帶土瘠民貧異於他方荒多熟少自昔而然加以康熙十二年以後軍興緊急雜派繁多民困滋甚豐年

皇上加僅可支持一遇水旱流離萬狀幸數年以來意撫綏禁止私派不恤蠲賑鳩鵠之民得苟延殘喘然以言乎家給人足則尚未也臣觀自古豐亨之治皆非一日而成

唐虞之世其初亦不免黎民阻饑堯舜兢兢業業積久而後烝民乃粒漢自高惠而後多方休養至於文景然後天下殷富唐之太宗日夜講求治道至貞觀之末然後民食充足今天下平定猶未久也而又疊遭水旱故

皇上之勤恤民隱而百姓猶未免於艱難無怪其然矣求其殷富亦無他道惟在

皇上常持此勤恤之心期之以積久而勿責效於旦夕恩已厚而不嫌其更厚心已周而不厭其更周則家給人足之盛庶乎可望矣至于目前所當議者臣見上年畿輔荒旱實異尋常其被災各州縣內雖有未被災之處亦不過稍有升合之獲差勝於被災者耳初奉

上諭將二十八年及二十九年上半年錢糧盡行蠲免已經撫臣出示曉諭後因部議分別被災州縣中有不被災地畝不准槩蠲百姓甚苦撫臣不得已題請秋後帶徵地方得以粗安然雖今歲秋收稍稔既徵其新又徵其舊臣恐非積貧之民所能堪也雖曰豐年所入幾何穀價又賤其值無幾私債之迫索者衣服之典當者已去其大半仰事俯育仍憂不足又可

責其兼完新舊之糧乎若非
皇上曲加垂恤臣恐有司惟知考成之是急不顧民力之難勝甚非
皇上蠲免之初意此臣所目擊地方情形不敢不為疏入
皇上陳之

上呼隴其近前曰陸隴其奏章是自作否對曰疏出臣手不敢假人
上稱善久之尋奉

詔盡行蠲免時湖廣總督某為湖南巡撫于養志奏請奪情隴其上

疏論之

論奪情疏臣辦事衙門聞九卿科道會議湖南巡撫

知所議若何及詢問與議諸臣謂會議之時昌言其不可者
固有其人而依回不斷者比比而是臣竊怪之此明白顯易
之事有何可疑而依回若是夫治天下之不可不以孝易明
也在任守制之非所以教孝易明也天下正當承平之時湖
南又非用兵之地無藉於在任守制易明也

皇上以孝治天下在廷諸臣沐浴於
皇上孝治之中久矣何難一言以直斷其不可耶且臣不知議者以
于養志為何如人如其非賢者耶則固不當使之在任守制

皇上一

矣如其誠賢者耶則必不肯安心於在任守制矣在督臣代
為題請或從愛惜人才起見然臣以為使之解任全孝正所
以深愛惜之况

日所行天下萬世奉為法程者也若使一撫臣因督臣之題
請而留將來督撫之丁憂者皆將援此為例其不思僥倖奪
情者鮮矣名教自此而弛綱常自此而壞此端一開關係天
下實非淺鮮至湖南一省之人是則是傲不復知有父母又
無足論矣竊以為督臣所請無容議可也臣不知九卿作何
啓奏理應靜聽

皇上定奪但恐眾論參差兩端易淆敢從名教綱常起見少効芻蕘

詔報可辛未夏旱應

詔陳言部議革職奉天安置

上心知其無他特宥之是年冬試俸滿改調歸又一年而卒年六十

有三四方人士聞者莫不傷悼嘉定之民縗經相弔哭于清
廉書院中及至葬門人會葬者皆伴墓三宿而去隴其學本

朱子以居敬窮理為要嘗與睢州湯斌書畧曰孔孟之道至朱子而大明四書經傳凡經考定者悉如化工造物學者但患其不行不患其不明但當求入其堂與不當又自關門戶自陽明王氏目為影響支離倡立新說盡變其成法援儒入墨以偽亂真天下靡然響應棄規矩而師心自用比之清談禍晉非刻論也今之學者必尊朱子而黜陽明然後是非明而學術一人心可正風俗可淳也又嘗曰南方有一黃藜洲北方有一孫夏峯皆當世君子然夏峰作理學宗傳混朱陸陽明為一藜洲學案亦尊戴山太過其論學類如此嘗跋張武承王學質疑自以關姚江之學比于孟子關楊墨于有明

諸儒獨心契薛敬軒胡敬齋羅整菴陳清瀾為學術正宗晚年設教東洞庭山學者從遊日益眾著有讀禮志疑六卷四書講義困勉錄三十七卷讀朱隨筆四卷三魚堂臚言十二卷松陽抄存二卷三魚堂文集十二卷外集六卷附錄二卷以上入四庫全書松陽講義十二卷問學錄四卷禮編四卷戰國策去毒二卷靈壽縣志十一卷衛濱日抄先正一隅集生平坐必端行必莊語必徐以簡燕居齋如不苟訾笑天性孝友父標錫歿時隴其方應名都門訃至徒跣奔喪歸孺慕哀泣日夕席地卧期年乃以土坯墊四隅而寢其上所制喪服皆遵朱子家禮性謙謹和厚善氣迎人告戒僮僕亦煦煦若子弟

及辨學術是非邪正論民生休戚政事得失又侃侃絕少依回云隴其既卒之三年春有提督江南學政之

命大學士王熙以病歿對

上曰何故不奏對曰七品以下官向無奏病歿例

上嗟歎良久曰本朝如此人不可多得矣雍正丙午

詔從祀孔子廟庭尋復入祀賢良祠乾隆丙辰

予謚清獻追贈內閣學士兼禮部侍郎

蔚州魏象樞寄贈隴其詩熙朝重守令宵旰憂斯民

吏道雖云雜天下豈無人我聞陸嘉定平生甘清貧下車甫一載惠政獨循循歡聲動萬戶異績傾朝紳江南財賦地知爾勞心神軍興正旁午輪將彌艱辛前令留餘燹於今見陽春盟手寫荒言始終願自珍君子貴藝好寧取面相親又聞宗閩洛義利別纖塵趨向不敢定踐履惟天真南北此心理龜勉若比鄰異時覩所學霖雨佐

楓宸

安溪李光地送隴其歸平湖詩越客孤帆迥高秋鞠蓋新行

哉無愠色卓爾見清神薄宦同窮巷幽居藉德隣晤言希一日相待有千春清濁付時論行藏自古人長當盟澗壑庶不負松筠爾祖宣公似斯文洛閩真後生需講藝奕葉賴當仁坐使異言熄弼成

聖化

醇閒飛湘水權飢食吳江尊信美雖南國離憂繫北辰碧霄賢路近多是遣蒲輪

按舊志清獻傳生平宦績槩從簡略意謂傳列道學專以

講學為主不知清獻自邑令超遷臺諫勞心撫字正直立

朝皆徵有本之學善乎學使雷鉉之言曰使陸子窮達出處有

一不合乎道則講說雖明亦何足以服天下後世之心哉

因考年譜重纂以備

國史採擇云

又按宋史道學傳先賢門弟子皆附本傳末以著師友淵源清獻及門多常熟青浦金山嘉善諸縣人今就邑中弟子前志所載者附列于後

倪淑則嘉興府吳志叅陸子年譜字貽孫歲貢生陸隴其弟子早喪母事父鍾瑞至孝隴其爲生員時鍾瑞延訓淑則賓主相得甚歡隴其授淑則以小學近思錄等書淑則恪守師說默識躬行又心經學生平睦族周貧邑稱長者年七十

一臨沒訓子以讀各經註疏朱子綱目語不及他

陸先生年譜邑孝廉

倪吉甫延先生訓其子淑則館於倪者凡七年淑則得先生指授謹守家法爲及門之冠云

沈宏勳嘉興府吳志字又召號紀山陸隴其弟子康熙辛未進士選陝西吳堡知縣先是秦饑發倉粟貸之至是嚴催貸者輸倉宏勳言民困未蘇得緩徵邑去榆林五百里歲運米千石草千束計丁而徵官無典籍以胥吏掌之弊百出宏勳稽核詳密手定一冊無偏累無苛索後令奉爲成法勸開墾勤課試以勞卒于官

趙光緒嘉興府吳志字襄孫陸隴其弟子年十三補庠生第一父督課甚嚴登康熙辛未進士授陝西寶雞知縣和平寬厚民愛戴之在任八年囹圄時空有趙福星之謠行取未及入都而卒

王素行嘉興府吳志叅張志字繪先陸隴其弟子孝友端重

年六十由縣試第一入泮一生然諾不欺講道一宗紫陽以樸實力行為務隴其歿為撰年譜若干卷家窶貧能貞苦節讀書西宮不能供藜糗日惟噉粥節屆小雪下體猶著生布做袴然志益堅令名好爵視之蔑如聞然為已惟日孳孳年七十餘以攻苦致病卒於道院

金廷煌嘉興府吳志字旭昌庠生陸隴其弟子性孝友好讀書經史子集無不淹貫言動輒以古人為法清獻嘗稱之曰日學者

陳榮樟張志字楚材廩膳生陸隴其弟子性孝友敦族誼有前輩典型以曾孫嗣龍封翰林院編修

按三魚堂日記辛未四月同邑沈宏勳趙光緒來學又長泖陸子年譜壬申歲同邑來執贄者有王鴻志陳榮樟陸律金廷煌四人今王鴻志陸律舊志不載行事莫考其餘諸人舊志有失載其為清獻弟子者皆補纂入原傳中

曹宗柱高志叅陸侍御年譜字星佑庠生陸隴其婿學於隴其力行孝弟精研理學叅訂三魚堂諸書及隴其歿與宸徵金山李鉉亦清獻婿同輯年譜嘗語其子煥謀曰年譜不但序述

先生出處蓋道統之傳於是乎在我三人成此書一以朱子年譜為式庶幾就正有道君子可以無憾耳後吳光西重加編次嘉興府知府吳永芳序而梓行張誠當湖私淑志清獻年譜一撰自清獻子宸

徵與其姪禮徵嘉善周梁好生氏叅訂曰長柳陸子年譜一撰自宸徵與其婿李鉉曹宗柱一撰自門人王素行康熙戊戌吳光酉始編次宗柱三人所撰本郡守吳永芳序而梓之曰陸侍御年譜雍正己酉光酉重輯增入三魚堂日記中語敘次加詳曰陸稼書先生年譜乾隆丙寅儀封張師載重訂曰陸子年譜壬申金山楊開基復即陸侍御年譜舊本增入從祀晉爵錫諡諸典曰陸清獻年譜皆梓行世今周好生所輯尚有鈔本王素行本則久散佚矣

陸定徵宸徵陸子年譜纂定徵字儼若隴其長子少有志操勉力向學經史制義皆能通貫隴其嘗曰長兒如吾法漸通文義四書本經之外以次讀詩春秋三禮國語國策史記漢書韓柳歐蘇之文涉獵通鑑綱目性理漸知聖賢門路矣及卒隴其念其學之幾于近道深痛悼焉宸徵字直方隴其次子監生性醇謹隴其沒論次行事撰年譜若干卷詳曹宗柱

傳

按前志所載師事清獻者尚有陸奎勳陸攀俞景模陸其璋四人然奎勳作學宮記稱我族侍御稼書先生並不稱師非受業可知陸攀作行狀借名倪淑則以其為清獻高弟則亦不自居弟子之列况清獻年譜三魚堂日記敘次及門甚詳並無四人名其他著述叅訂姓氏中又無其人想修志時以諸人私淑假名附驥今不敢濫入並於諸人本傳中刪去前志師事之說免致日後傳誤

文苑 按明史邑人屠應竣附傳文苑今仕宦七品以上雖以著作重者亦同編列傳其窮而著書之人則列為文苑並載其書名卷帙凡工制義者亦間附焉

宋

魯應龍海鹽圖經參朱志字子謙司理文謚族孫宋末布衣著閑窓括異志載邑中故實及為家門傳懿皆足副藝圃談資亦著撰一小品也

陸昌二程志都巡檢文遠孫工詩慕少陵句法有杜詩補註行世子坊博極羣書辟舉不就人咸高之

元

屠曾海鹽圖經字體乾一作體寧少名一郎母樂夢王曾而生故名曾

受書于臨川吳草廬延祐中江洲行省薦為學教諭至治癸

亥中湖江東榜第一有虞庭慶雲賦為藝林稱重虞庭慶雲賦 朔厥皇

虞敷天孝德蒸又格姦祇載夔栗當宁升聞班寮師錫有鰥登庸側陋皇赫徽典敘揆賓門覲辟左禹右臯前稷後高慍解八風教訖四極夫何休瑞之氤氳兮殫苞符之景彰鼓率舞之百獸兮降儀庭之鳳凰撫無為之化瑟兮正恭已之衣裳垂天雲之殊異兮光絢爛而疑祥若烟非烟若雲非雲郁亦油油續續紛紛綏隼昭回蕭索輪菌狎獵參差龍從礪噴丹霞失麗含譽竊明羣真製匪借色雲君宮延藻映黼座光騰迴環炳煥方賁燁奕非單彩而成純匪三色而化霽是日卿靄布伏維五墨如玄圭素如玉禾赤如絳綃黃如瓊芝青如蒼珂如璧如璋如璣如組乍散乍合或翕或張璀璨離披吞吐爛斑舒卷繪空雅同順逆遲速錯綜之七政盤旋結綵不讓山龍藻火締繡之五章寫鳳翥之翩翩貌龍旗之央央佐薰風之稷稷捧君日之皇皇紺碧朱藍變幻靡常瞻霄騰漢漾喜起於朝堂被袵彈絃侑色笑於英皇濟濟師師占雲異而咏歌明良于于睢睢覩雲物而距踊翱翔駐車蓋於封中儼軒轅之花葩環纓絡於陽舒軼王母之朱幡聞之雲者為運運聚而成山澤通氣雲泉相因維斯雲煜孰叶其禎屆茲宇宙元會文明圖籙曰帝王有孝德天應以卿雲原夫負罪引慝雲之蒙兮克諧底豫雲之開兮受終陟帝雲之升兮神享事治雲之應兮揆岳牧伯雲之從兮濬哲重華雲之輝

平海縣志 卷九
今繼巍乎之成功兮亦煥乎其文章兮有天下不與兮聖姓
之空洞兮雖卿雲之有爛兮亦浮翳之過太虛兮孝德敷天
兮永以為君極兮授建康學正不就隱于家元孫勳有傳橋李詩繫
浦北里許土會世居乍
家山永福巷

按乍浦志曾宣慰楊耐翁婿吳元年籍沒楊氏其家遷避
虹霓堰楊澈浦人朱志并以曾為澈浦人列僑寓誤

明

孫固法志叅兩浙名賢錄字以貞生元泰定間性恬淡好讀
書博綜今古長于詞賦築室顧泖之陽顏其齋曰聽雪常有
羣盜鬪至村聚老幼奔避固讀書聲聞於外盜知之不入其
戶洪武初辟署南直華亭學不赴與楊維禎陶宗儀友善著

有聽雪齋稿元孫璽有傳

程志初居華亭鄉明初給戶帖曰真一後徙居當湖

陳昌朱志字穎昌號菊莊景泰間庠生有詩名與里中沈石
窗兄弟交善石窗目為畏友所著菊莊集今無傳其詩僅見

朱翰所輯橋李英華才思藻麗長于七言海鹽徐豐厓詩談

稱為名家

橋李詩繫我郡自清江吳隱後風雅衰落二陳二李之餘無聞焉至正統天順間而始盛一時如陳

菊莊外嘉興有姚穀庵海鹽有張方洲嘉善有周桐邨皆卓
然大家也菊莊我里先哲惜其集不傳僅從橋李英華錄若
干首窺其一班已足俯視流輩子韓是編遍搜遺稿大抵所
傳者多科目中人至於恨人崎士山夫野叟半就湮沒數年
來悉力采之一以表微為務古
人三非作之難傳之難信乎

李璧朱志字少白庠生有文名與茅見倉瓚輩為雲居十才

子之一後以事下獄茅屬提學孔文谷出之惜無遺文可傳

其死節李斷女即璧之姪女也

乍浦志明代乍浦秀民入庠者自璧始璧有姊嫁海鹽劉

東靈東靈死貧無依壁迎養終其身

馮敏効朱志字忠卿號季山揚州同知汝弼次子貢生少善

屬文七舉不第杜門著述工詞賦大小行書日置酒集故人

詞客更製新詞佐之嘗渡江中流被風舟幾覆賦詩自若所

著小有亭集三十卷字學史纂各一卷子伯禎字正伯亦工

詩有青陽集

鵝李詩繫初汝弼與諸子避倭假宿東園因析二字作口號云曲川地可耕長刀砍低樹元來

腹有文軍口三十去令諸子合之敏効年十五應日是勦寇二字明日得報大捷

洪世基程志字爾濟

朱志作弱生誤

生而奇穎六歲能屬文萬歷庚

子舉於鄉日扁關手一編校閱歲時伏臘都忘郡邑長吏絕

不通謁生平無中人產口不言財利丁未計偕復落乙榜有

十八房衡明文檢諸選海內稱之

陸基仁朱志字元卿監生篤學不倦嘗師事袁了凡得其穎

悟所著易元尚書傳鉢詩說纂元禮記道窾春秋刪補胡傳

史記寶鏡諸書

孫宏祖朱志叅柘上遺詩字令宏刑部尚書簡肅植孫監生

少負軼才與陸澄原趙韓陸啓法馮洪業諸人結詩酒社為

人翫麟岬嶼不為世所可文詞多詭聞異藻幽踪獨韻感慨

淋漓自比於怨姬思婦詩善五古著有樸語影語可笑言諸

刻子愚公字伯愚亦能詩有惜誦集

姚世勳朱志字元仲天啓甲子舉人甲申後隱居專心易理
晚歲家益落講易城隍廟暇以奕酒自娛著有易剝講義

姚世靖朱志叅柘上遺詩字子清號藥師幼孤事母孝居廣
陳遊學華亭為華亭生員授經陳海士門下崇正壬午後息

意仕進栖隱南溪書屋樂貧教子為詩秀逸一空俗調有翠
樾軒稿世靖自解詩五十王融較半非高陽窮鬼况因依直
教蕪穢連荒徑更遣飄搖到敝衣白髮漸生妻子笑

黃金欲盡故人稀只餘賦草
為雲氣山雨來時千丈飛
俞懋敬朱志字元禮九歲能文中年得孿疾右手廢習左手

書著漱石集十二卷弟懋相字元簡例貢生性脫畧不修邊
幅詩賦自娛名其稿曰酣語

沈澣朱志字則新家貧隨父讀書鄉塾刻苦能文屢試無所
遇遂棄帖括肆力於經史授徒海鹽與胡震亨姚士粦輩交

著讀書醒學庸蒙後尚書印王太史錫袞見之嘆為吾道長
城晚年布衣茹素詮注老莊無疾而卒

陸啓浚朱志叅樵李詩繫字叔度貢生十歲能作古文辭讀
書過目成誦弱冠博極經史不事章句侷儻負奇通輕俠類

河朔壯士好談論古今成敗知邊塞事纒纒不可窮自題其
齋曰天生我才必有用黃金散盡還復來客燕京二十年交

滿長安然終不遇歸而貧甚隨值喪亂乃更名遜字山翁間
與酒人奇士邂逅相遭輒短歌歛歛聲淚俱下詩法全宗少

陵著有賁趾山房詩文集一百卷讀史十部四十卷經世譜
八卷太元測一卷射訣一卷拓上遺詩啓法少為貴公子性
豪邁嘗遊建業命酒泛舟召舊

院名姬大會詞人於秦淮酒半某姬倚檻微歎曰惜無兩岸
紅蕖佐此勝集啟法明日隨復置讌比客至則晚風拂席荷
香襲人舉座莫測其故蓋是夕懸金購得數百缸碎而沉之
頃刻繞水自是十四樓中皆指日之不滅樊川趙韓哭叔度
詩飄泊征途國士輕誰為公子拜侯生猶慚馬革收骸骨肯
學鴟夷變姓名屐底雲山詩欲畫匣中風雨劍常鳴杜陵無
數間關句每讀
雄篇便不平

趙韓朱志叅樵李詩繫字退之初名京翰字右翰父維寰文
名動海內韓復繼起有大許小許之目萬歷壬子副榜丁巳
援例入北雍與四方才士交戶外屢常滿吳默識當束髮時
承父命願侍函丈韓固辭迨壬午遊南雍吳已為司業握手

大驚曰是吾師也今乃以辟雍稱弟子耶韓嘗自謂生平於

詩可許獨步識者稱其雄雋傲兀刊落常調為一時之豪云

晚年自號欖生著欖言蠟言蔗言子泐有傳

沈季友東湖耆
舊詩當代才名

起澗阿欖生瀟灑善詩歌文章
兩世成何用欲哭秋風奈爾何

錢士馨浙江通志叅樵李詩繫字穉農貢生少讀書化城庵

研究經史多所撰述遇奇聞異義輒以硃墨標之錄為別冊

或訝其多端寡要應之曰記事纂言此法最善食稗者弗肥

書豈必全讀耶崇禎壬午遊南雍見知於吳梅邨尋入燕公

卿爭欲客士馨士馨久而厭薄之人漸目為狂生賊犯京中

允李明睿密請南遷士馨私謁之泣曰賊盡得秦隴晝夜行

四五百里倘繞出畿南以抗警蹕公將何辭以謝天下李慙
 懼又曰不如死守以待勤王之兵先遣太子南行以繫人望
 李難之及京城陷士馨匿跡樵林已而復往來河朔間盡交
 其豪傑偶偕五人至慶陽薄暮微雨五虎躍出土馨曰不盡
 殺何以見諸君勇乃人發一矢當者立斃一少年矢貫虎額
 尺許虎入林莽中追割其舌以報至旅店縱飲獨不與少年
 酒責之曰發矢不中要害不足多也後奔走無所成有勸以
 仕者不應遂還貧益甚至不能舉火生平工古文詞兼精書
 畫每抵掌古今必縱橫數千言卒至窮老以死著有古文易
 二卷周禮說一卷周禮答疑三卷冬官補亡三卷儀禮說一

卷禮記申戒一卷王制說一卷月令說一卷緇衣說一卷中

庸說一卷春秋志禮八卷續越絕書二卷載朱熹尊經義考

詩穉農逸氣滿江關飽歷兵戈老始還
今日遺書零落盡不堪澆酒向青山

孫曾楠浙江通志叅嘉興府吳志字讓生刑部尚書簡肅植

曾孫結廬秋涇庭栽梅竹顏所居曰鐵菴人稱鐵菴先生雲

間陳繼儒以家藏楊廉夫鐵冠鐵笛為壽曰冠貯竹葉酒笛

作梅花弄此庵大不俗矣偕妻黃月輝按月輝名德貞曾楠

從詩繫吟詩其中平章詩史著梅間草竹裏吟學陶集數種
核正

按秋涇在府治東北孫氏自簡肅即徙居嘉興故曾楠結

廬其地府志列為邑人以其為邑庠生耳茲仍其舊

俞允懷朱志叅柘上遺詩字懷茲庠生窮經博古廣聲氣受知於張天如楊維斗諸人著名婁東金沙文社晚年發為聲歌多高淡寂寞之想著海濱野老集

陸上瀾朱志字芳洲號狂生生而聰穎四歲能誦唐詩十歲五經諸史及大家文無不通貫邑中以神童目之崇正丙子中南闈第二出公安袁特邱門袁官淮右公車北上胥吏以資斧進堅拒之曰我豈與小人作緣晚避兵村舍足不入城市性寬慈不校善養天和叔龍如舅金履元家貧無依迎養喪葬皆盡禮從弟有私鬻其新宅者竟置不問年幾八十日手一編弗輟所著詩文集二十卷間齋志林四卷湖邑記聞

王鈞小史諸書皆未刻其已刻者僅三國六朝文選陸子三

編橋李詩繫我湖稱博雅者子來章字孟公善讀為當湖七

子之一沈季友東湖者舊詩博物真堪重夜臺芳洲門徑鎖蒼苔錦書一半無人讀思煞雄吞萬卷才

李萼柘上遺詩字剛甫少無朋從自以意績學毘陵薛學使

應旂見其文重之以為有道氣萼遂自命必為聖人作克念

圖從王龍谿遊終日正容默坐時出城市默自數步而行或

時迴步從前路起再整步期不失尺寸人以是迂之環堵蕭

然一意好道自稱也醒居士年五十餘卒按年浦志萼即李確之伯祖也博聞

多識應試顧厨俊及三十二人不書名而書字無子遺稿悉散軼嗣子惟涇亦蚤世司成沈懋孝為作兩介士傳一萼一

潘鵬也萼墓在牛橋西鵬另有傳

王路乍浦志字仲遵號澹雲其先松江之鳳凰山人後徙邑
虹霓堰七世生路幼嗜學多所綜覽集古安貧之士為書曰
冰蘗蒼又著客牕留三十詠性喜蒔花居龍湫萬松臺輯花
史左編二十四卷雲間陳繼儒為作前後序行世惜右編未
就而卒花史陳山寺後有臺萬松擁護予花史左右編實成
於此時見萬翠飛來元名萬松臺予補作萬松臺記
李天植九山志仲遵花史已刻行今雖不傳而前後兩序余
見之白石山房藏稿中直足不朽仲遵矣彼軒冕錢刀不足
邀達人一盼然則人固貴自豎哉

按龍湫山人謂花史不傳賴陳繼儒序以傳嘖嘖于路之
不朽所謂君子疾沒世而名不稱也今花史已有刊本

欽定淵鑿類函駢字類編等書皆經採取是路之傳世又不僅如山

人所云矣

王端九山志叅柘上遺詩字正始號雲外又稱雲王居士路
之弟也嘗讀書湯山澆花種竹多有別致中年棄舉子業學
劍好兵家言時方多事乃著車戰圖及城守要畧諸書天崇
間走南都以策干當事不見用後竟如其言性好交能詩畫
喜遊山水以丹青著名白下卒年五十有四臨沒屬其子以
明處士表墓焉遺稿有雲外集蜃園遺文子漣字蘭為號寅
旭邑庠生能詩

許丕祚乍浦志字芝裘號孝拙廩膳生少孤事母以孝聞績
學工文敦重名節乙酉秋為亂兵所害及門李慶乙哀集所

作名拙菴遺稿今散佚

宋景闕者舊詩礪角無殘碑飽蟬有廢簡一窺元豹竄三嘆廣陵散奈何

遭亂離畢命於克悍堙篋慘不調人琴為悽斷

倪端九山志初名涵元字惺孩世居清溪父醇字鍾白著有

白雪談柄端家貧父沒與母自邑中遷于龍湫山之陰以教

授為業喜為詩好客每蓄旨酒以供吟社兒輩悉教治農圃

有隱者風後苦目疾年五十四卒所著有效蛩集

按龍湫山人嘗云余初未識惺孩宋爾恒讀書山中與之

遊為余言後余讀其登陳山詩海濤斜捲白秋葉遠含紅

之句殊有唐風遂與定交前人文字知交如此

宋咸陸錫禮九山志參張志咸初名斌字二完後字爾恒別

號覺非工舉子業喜為詩讀書于陳山潛心易學著有易說

李天植為作萬松臺讀易圖記性倜儻不拘小節工臨池筆

力遒勁又善奕家貧不給遂薄遊金陵上湖湘有卜居半山

之志年四十九卒著有金陵遊草唐詩合治忘機社詩選錫

禮字中黃亦善易學與咸齊名入忘機社中著有讀易微言

李天植唇園遺文余與社中交也以朱九先為畏友宋二完

為勝友倪惺孩時聖傳陸中黃周雲虬為益友而王長麟昆

季則千里友也元徹禪師則方外友也大都與道近而與俗遠者故一日定交終身以之

按張志宋陸合傳以其同為忘機社中人也今附錄唇園

遺文備存社中人姓氏並考乍浦志云時一中字聖傳其

所著今散佚明宰弱齡負異才清狂簡忽乙酉秋爲仇家所戕王長鱗名六龍鄞人朱九先名萬齡里居未詳又考元徹禪師名圓映號雪溪嘉善西林菴僧作詩清新崇正間居乍浦與李潛夫唱和有西林焚餘草見樵李詩繫

國朝

金式玉字藍珂性嗜書工詩古文詞順治丙戌拔貢授壽昌縣訓導辛丑成進士與弟璞玉等晨夕課誦旣登第歸遇邑有文社必攜筆墨與會制藝益丁謙退下人終日手不釋卷著有律呂新書註三易通四書人物考

按舊志稱式玉爲訓導時捐俸置義田貧士有緩急多寡必應及舉于鄉集貧士於庭舉券焚之又稱其終日侍父母如嬰兒有所獲悉以奉親無纖毫私蓄母卒哀毀甚終母七而亡是式玉乃孝義兼盡之士今因其著作可傳特列文苑亦見文人多優於行云

許丕猷九山續補志字元震博聞強識與兄丕祚齊名著有稽古類言續集諸書子質字初白亦能文

孫之琮朱志字元襄仁和人少負逸才廣搜異書典故爲文古雅軼蕩學使者試輒第一晚年結茅西溪馮徵君洪業招致之遂移家鸚鵡湖上洪業好客每當名流大集酒酣援筆數百言立就著有史論一卷粗細草一卷纂類十卷及輿地

山川圖行世高志子眉光字季崧號嘯夫庠生能文工詩有
溫李風致知縣朱維熊延修邑志考核詳明衆論稱之

馮秉恭朱志叅柘上遺詩字子近為名家子性不羈骯髒忤
俗善哭意有不適長號者移時為諸生不遇放廢詩酒晚居

北郊別墅貯法書古瓷以自玩嘗與劍客酒人拔地起舞或
醉卧水亭間與牧豎為伍驅犢荷蓑作野老態著有亦諺蒿

齋諸集沈季友東湖耆舊詩抱犢鋤花句漫題蒿齋處
士樂幽棲憐君理玉終無地鬼火燒青夜滿溪

陳國政樵李詩繫叅張志字憲生讀書元珠寺婁東張太史

溥雅重之順治庚子歲貢入都寶坻杜文端當國慕其名延
為子師終老名塲晚而歸里於所居之南構三非園起秋聲

閣栽花蒔竹嘯咏其中二十年不入城市有陳子古業二卷

詩集二卷

馬廣幹朱志叅柘上遺詩字飛生靖江訓導鳴雷子生員幼

警敏讀書過目成誦伸紙數千言立就尤長辨才遇詩酒遊
讌賓友歛集輒葛巾鹿裘高談雄論連舉觥船數十神氣自

若家貧以教授為事凡理學性命及古今成敗得失矢口講
論多別解使人亶亶忘倦歸其門者日衆著有四書讀詩文

集歿後門人私謚曰端敏先生沈季友東湖耆舊詩儒雅扶
風擅一燈談經戶屢日常增

老生七十無章綬
不及相如死茂陵

于琳朱志叅柘上遺詩字貞瑕號甘山父有恒字聖初負才

名工書法尤精於易天啓間以貢授四川南溪主簿卒官琳博極羣書為文屢變試輒高等少任俠喜擊劍談兵順治庚子膺歲薦不赴教授生徒嘗承父志述三易得習學九卷廣變四卷象告二卷皆原九圖之意以立言兼通六壬旁及地理醫術無不窮究書畫俱臻逸品晚年習禪理庚申冬翛然揮手而逝年八十五著有士學古編二十卷已酉集香祖菴草沈季友東湖耆舊詩磊落甘山日苦飢學書學劔學禪儀如今眼底無奇士招爾清魂續楚詞

柯宏祚嘉興府吳志叅張志字魯山九歲補庠生甲申後棄去舉子業素冠布服遊燕南江北與方外畸人交遊歷所經詠歌甚富有九山草堂集年九十三卒

朱之鑑九山續補志字孟昭號平齋年十五始讀書旋入學性高傲物自謂狂生人亦狂之遭亂避跡雙徑虞山之間者數年歸里後不復應試禿頂緇衣教授生徒與馮秉恭周宏起最善所著多散佚止遺北牕存稿一卷

周宏起高志叅乍浦志字雲蚪號道腴又自稱寓庸幼不甚穎異潛心力學後竟大成為古文縱橫排募與許丕祚齊名有海上二虬之目康熙辛亥寧都魏禧訪李天植主宏起家著有易經集義甬上仇兆鰲見而稱之又有四書集義陸清獻作序謂其排斥姚江有功於考亭壬子知縣陳孚宸延修邑志後以歲貢任青田訓導卒年八十三遺有望古堂詩文

集

沈日星高志字明阿號大山布政使君楨子庠生與弟不負俱以能詩名少從父宦江右黎博菴器重之所交皆當世名人遊金陵與吳梅村劉伯宗姜如農諸前輩爲同社友吟咏至老不倦著有蘭石齋詩草子甸字南城增廣生博學能文爲人端方嚴重著野意齋詩集

陸埜朱志字我謀號曠菴郡庠生爲人外和內介交遊有過輒面斥之無所忌書齋高爽山池草樹頗擅幽勝日擁書萬卷嘯歌其中塵務不縈於懷亦不問家人生產計非騷人雅士不得窺堂奧也晚歲娛情詩酒著作甚富藁多不存所刻

曠菴詞一卷年六十卒橋李詩繫埜少與趙汭陸棻沈皞日陸世栻陸來章沈隆峴稱當湖七子

郭襄圖朱志叅橋李詩繫字阜旭號匡山明御史紹儀季子兄雍圖順治辛卯舉人以父年高不赴公車襄圖歲貢生弱冠爲張溥文德翼所賞長益工詩三吳社集皆知名性倜儻好事交遊談讌無虛日歌舞絲竹六博倡優時時徵逐以爲樂乙酉泛舟入海期年歸一日殺其仇于市下獄賴友人李慶乙以脫自壯至老奔走四方久而無所遇曹侍郎溶嘗贈詩曰苦吟經戰伐短褐老乾坤其風味可知矣晚年買妾居臯橋竟死于吳有更生集嘉興府吳志襄圖與沈季友同輯

柘上遺詩行世無子撫其外孫鍾氏子三人為後長機字石
城府學廩生博學工文姜學使楠延入幕謂才冠浙士次光

秘隄事兄至恭俱早卒

吳雯贈匡山老人詩匡山老人齊得喪鬢髮蕭騷骨骸嶙嶙讀書萬卷眼不

昏飲酒一斗神猶王五經腹笥何便便蹉跎一官失少年宰

相豈肯借車馬司業何曾與酒錢搗來燕市屠沽酒醉聽琵琶

夜忘寢節鼓常敦翡翠盤翻杯輒浣葡萄錦千鍾百榼氣

轉豪客帳猶懸舊寶刀起舞身搖謝蝴蝶和歌聲亂鄭櫻桃

忽對長空見歸鳥自傷為客何時了

金馬門前再住難春明徒走邯鄲道

按柘上遺詩凡四卷所收皆邑人人各綴小傳自達官寒

士以及流寓方外閨秀咸備其書初名樵李詩乘當是續

蔣之翹編為樵李詩繫嚆矢其後襄圖沒沈季友乃獨任

編輯故詩繫邑人小傳大半藍本遺詩

趙佃朱志叅張志字天來別號帆青韓子少聰敏經史百家

皆淹貫年十五補庠生試輒高等中歲無所遇詩得中唐人

高格與閣學陸棻等舉當湖七子會詳陸棻傳性狷介外柔

內剛疾惡不少假不喜飲酒遇四方士燕會端坐竟席不妄

發一言粵東馮學使聞其名聘之抵署即歸曰我欲一啖荔

枝耳寧能作人幕客耶游燕歸獨居一室遂與世絕病革顧

諸兒索筆書曰正性不磨何難朝聞而夕死卑躬受益尚其

修己以光前擲筆而逝著有度嶺言紅豆詞資真集藏于家
人謂趙氏祖孫父子皆天下才三值數竒為之惋惜
沈調樵李詩繫叅張志字叔輪號尚廬又號香嚴家世豪盛

折節讀書為邑生不遇棄去日誦佛言梵唄之餘輒作裙屐
冶遊老而勿悔有書屋數椽惟名僧韻士樂為談對庭列雙
松日哦詩其下與宗人季友居相近唱和最多著有金庭詩
草沈季友東湖耆舊詩吟社風流憶昔頰暮年裙屐尚嬉春雙松石畔婆娑處付與山陽笛裏人
沈崧高志字涵中號古民歲貢生博極羣書癖耽吟咏為人
軒昂磊落有陳元龍槩分纂邑志網羅舊聞人謂兼才學識
三長所著有長水雜詩行世

鮑駿張志字聲來號桐石由增廣生入太學執經長洲汪琬
門下琬稱其詩入劉錢之室一時名宿如施閏章王士正葉
方藹田雯潘耒皆相見恨晚以博學鴻詞薦丁外艱不獲試

而歸服闋有徧遊五嶽之志歷雲中江右黃山武彝天台至
必題詩倦遊歸築室曰草庭琬為作記駿祖文遠工二王書

法駿承家學更極縱橫盡致自成一家

葉之洪挽桐石詩平生閱盡世途非一夕

寒飈貫少微湖上有山埋傲骨寰中無處仰清徽詩狂草聖如雲過碧石青桐待鶴歸但惜釣璜年欠二空教寂寞負漁磯

錢起隆張志字買山生員長於詩與陸閣學棗葉中書舒崇
有柘湖三俊之目入太學試北闈不售遊燕楚齊豫間題詠
益多歿於山左稿散佚無存

沈不負高志字集九號東樂邑庠生十歲能文尤工詩與兄
日星齊名性孝友兄弟既析居旬日不晤輒拿舟往訊後仍

同居清溪著有老雲齋詩刪十卷村居詩一卷哦石齋稿四卷韻鈔四卷

陸士燁樵李詩繫字昭文舉人上瀾孫監生好學工文弟士琰康熙甲子發解並有文名而燁終困名場鬱抑以死藝林爲之扼腕著有蕉侶遺草

張家漢嘉興府吳志叅張志字漢中讀書十行俱下爲文磅礪奇古康熙甲子副榜庚午幾入殼復遭黜落巡撫遂寧張鵬翮奇其文延爲子師居四載雅以學行相契後衍聖公敦請執弟子禮儀封張清恪爲運河道延主濟寧書院未幾歸年七十五卒著有詒安堂古文及制義族弟綦字墨若胸懷

蕭逸亦工詩

陸攀張志叅樵李詩繫字威咫清獻族叔年少于清獻清獻館倪氏校閱大全釐正制義研究道學諸書攀時與叅訂康熙丙寅以拔貢入都旋歸鍵戶著述工書善琴兼精岐黃之術爲詩縱橫兀莽頗肖蘇梅有易義韻譜四書尊聞錄枕上吟宜雅堂集年五十忽嬰痼疾猶日口授尚書數條未竟而歿

按當湖人文逸謂攀受業清獻誤

沈季友浙江通志叅高志字客子號南疑西平知縣蔡子康熙丁卯副榜少聰穎精制藝及古文詞尤工詩原本漢魏六朝出入三唐自成一家嘗侍父西平署山陰丞檢討奇齡一

見歎為曠世逸才年二十六刊南疑集行世一時紙貴名動
 江左叔棟豐于貲卒無子季友當嗣自以親恩未報不忍為
 人後遂賦遠遊生平至性過人蓼莪陟岵之思時寓諸詩已
 而遊都下海內名宿如新城王士正宜興陳其年番禺梁佩
 蘭長洲汪琬輩皆相見恨晚交推重之婦翁陸閣學萊著作
 每引叅定時稱冰清玉潤由正黃旗教習考授知縣未及任
 而歸杜門著書敦名教刊譜立祠石莊一族賴之分纂邑乘
 詳瞻有體請祀李天植馬嘉楨於鄉賢祠捐資贖閩人之鬻
 於旗者鄉人咸高其義沒年四十六所著有橋李詩繫四十
 二卷入四庫全書四庫全書簡明目錄所錄嘉興一郡之詩
由漢晉以至

國朝

每人各為小傳詩中山川古蹟民風物產亦多所考證于
 東景詩橋李遺詩不盡傳璧埋珠擲儘堪憐南疑辛苦勤收
 輯無數吟柘上遺詩四卷按是書與郭襄圖
 魂泣九泉同輯見襄圖傳學古堂詩集六

卷按南疑集及秋蓬集廻紅集一卷賦格十卷方笛集制藝

行世子塢字東表亦能詩入洛如社梁佩蘭送客子還平湖

花濃燕地滿碧草馬頭生亂峯行看南湖月坐聽平湖鐘湖
 上鴛鴦鳥雙雙栖影重吳雲題林屋山居圖詩紫茜當年有
 舊廬如何又買洞庭居閒名世上喧騰甚待學琴高控鯉魚
 具區三萬六千頃隔斷人間事似麻石屋金庭休更覓此中
 大好讀南華黑牛耕熟崦中田橋稅茶租取自然清酒百壺
 書萬卷不須更費沈郎錢王士正答客子示洞庭新詩詩吳
 越具區藪中浮兩洞庭逸情逐花水長嘯獨揚舲靈
 笈傳神禹丹砂訪蔡經抽帆吾計得同看莫釐青

按季友橋李詩繫金南鏡校閱刊刻秀水朱檢討藝尊序
 謂其為一郡詩林千秋文獻資而季友乃邑人故敘邑人

尤詳今其書進呈

御覽

欽命編入四庫全書凡詩人入選者藉以不朽顧其中有前志所已收者仍分入各門而參用其傳有前志所未及收者而其傳止寥寥數語若列入文苑自為一傳則傳文太畧若竟不載是其人已登

天祿石渠反見屈于邑乘亦非表微闡幽之道因變例仿柳宗元獨孤申叔墓碣體參用史記魯仲連鄒陽屈原賈誼異代合傳例擇前志所遺前明及

國朝諸詩人合錄季友傳下低一格書之

明

張仁樵李詩繫柳志載張仁三詩法志云是邑人時未分縣無考

沈懋樵李詩繫字元懋號樵軒天順間布衣按懋後贈刑部主事子煉

孫圻各有傳

潘寔樵李詩繫字以誠

沈爓樵李詩繫字益峰正德間文學

沈維鋹樵李詩繫字雲涯嘉靖間文學

戈思齊樵李詩繫字子賢號龍村嘉隆間布衣有垂裕堂集按思齊後贈刑部郎中子用泰有傳

洪默樵李詩繫字惟緘蒸弟隆萬間文學

孫成名樵李詩繫字允仁號儀蜃簡肅仲子萬歷已卯舉人自號超然道人有薄遊漫草兩京浪遊集

陸光岳樵李詩繫字與喬號日峰淞之孫萬歷戊戌以貢授廣信訓導

沈紹心樵李詩繫字懋真號五客萬歷壬子舉人有明月齋稿

沈維鑿樵李詩繫字新卿號雲門萬歷間桐城教諭

屠中孚樵李詩繫字德允號敏瀾應埈孫茂才有重暉堂集

陸在前樵李詩繫字令瞻有罪玉集子鏊貴封副使

林中英樵李詩繫字儲聲萬歷中布衣

曹隨樵李詩繫字是誰初名爾善字令民別號簡在居士汾州知府徵庸弟以諸生遊成均與孫令宏毛修之齊名著有壹是山居集大泌山人序之

馬萬方樵李詩繫字遐卿少負不羈好與酒人遊能高歌作燕趙聲意有所觸忽碎壺痛哭四座皆驚嘗爲其父上書幾中黨禍復上冢宰堂大聲白寃事稍解後爲亡命罹法逸去籍其家有訥庵草

王偉樵李詩繫字青芝

馬鳴雷樵李詩繫字國威號伯臺爲靖江訓導經喪亂歸里乙酉七月遇兵命家人曰我老無所之若等各宜遠避城陷獨坐空堂遇害

馬嘉松樵李詩繫字曼生德澄子有花鏡雋聲北遊瑣言十可篇東湖著諸集

葉方宸樵李詩繫字遇之天啓辛酉中式旋丁外艱絕意仕進與兄方寰鼎新報本塔樂善好施里中稱葉氏二長者

沈原淳樵李詩繫字伯淳明末由諸生入太學與陸啓法諸人友善多酌倡之作兵火以來後嗣凋落遺稿無傳

戈金湯樵李詩繫字帶如郎中用泰子

國朝

陸濟明樵李詩繫字以昱號梅岑濟睿弟博綜六籍有東園漫興藁

陸之瀚樵李詩繫字水立父懋功官四川保寧知府幼年隨侍徧覽太白峨眉諸勝歸值鼎革放情詩酒自號白鶴山人與同里錢士馨施洪烈族人濬睿上瀾相唱和晚年食貧樵蘇不繫泊如也湖中久苦糧役中人破產者無算瀚與弟之瀛糾同志九人請諸范中丞立官收官兌法民賴以甦有蜀歸記鶴山草堂集

范琦樵李詩繫字林奇庠生鼎革後不復應舉授徒自給
有斌斌子遊稿惜多散佚

陳瀉樵李詩繫字子虛郊居避俗松枝梅萼掩映三逕間
多藏書畫古器無不精妙有寄松堂集

陸之泓樵李詩繫字我上年十二入黌序有聲復社庚子
省試已入穀房考爭元竟斥拂鬱而死

陸英標樵李詩繫字彥威縣學生能文善書卒年二十九
沈起雷樵李詩繫原名隆峴字平萬貢生

徐之樵李詩繫字遠將精於天官家言
李碧樵李詩繫字石水幼孤能文與先輩趙無聲陸嗣端

馮兼山諸公友爲人伉爽不苟然諾有鴻儀堂集

陸谷樵李詩繫初名樵字嬾漁又字亦樵後稱樵道人妻
子旣喪遍遊名山水以終有夜鴻鳴集

趙璜樵李詩繫字道闇號闇然有見抄集

唐俊樵李詩繫字聖翼又字西孟號大千後改號髮樵及
頭禿又號道禿有石田錄

胡采樵李詩繫字英千縣學生嗣璜從子居嘗賭酒賡花
人方竹林二阮孫紹安康熙丙子舉人

汪澐樵李詩繫字子倬錢塘人流寓當湖

胡介樵李詩繫字柳若歲貢生制義之外兼擅吟咏惜其

稟湮沒僅從扇頭錄得一絕亦可想其高懷勝致矣

張璠樵李詩繫字峒一號須裘海門令大雅孫受業於張
侗初才氣豪邁有載石舫諸刻

屠敦增樵李詩繫字閔兼父象美罹難家室流離諸子貧
窳增獨力學能文見重於時然久困場屋康熙戊午挾策
北遊久居燕邸忽索僧龕跌坐作偈語投筆而逝

吳同雲樵李詩繫字雲芝庠生

馮元白樵李詩繫字匏慈庠生有則鳴剝業

楊爝樵李詩繫字彦方兆梧次子少負儁才偃蹇不遇年
二十八卒

馬辰御樵李詩繫字青蓮萬方子有絳雪亭集

王庾山樵李詩繫字咫岫早卒有詩未刻

沈嶸樵李詩繫字華九隨父皞日官柳州始學爲詩未幾
入都沒于舟次有楞花草

張宗信樵李詩繫字以純號石琴有素閣吟

沈是樵李詩繫字去非生平謹信老爲塾師有稿未刻

陸世枻樵李詩繫字古璣號仁山濬睿叔子縣學生援例
入北雍屢試不遇乃以觴咏自娛有西臯剩稿

陸穎武樵李詩繫字慧遠號賓菴縣學生

沈貫日樵李詩繫字子虹

邵翼樵李詩繫字汝爲號冲菴延齡少子太學生亡年三十有柘農集

時達德樵李詩繫字長民有和施仲芳梅花詩百二十首
沈乘樵李詩繫字洪緯信子有匏落吟集

陸枝山樵李詩繫字仲孫原名世權庠生博學工制藝年三十三卒

張渭樵李詩繫字子瀾庠生

金煜樵李詩繫字朗如諸生少受知于邑令吳春枝在任三年不屑以片紙干瀆著有舊聞薈萃如干卷子作輅康熙甲子舉人

馬輝曾樵李詩繫字學山號邁庵給諫嘉植仲子有三湘燕趙游草

按朱彝尊樵李詩繫序曰詩十五國風非孤臣悲憤之作卽羈客寡女愁苦之吟後之稱詩者動曰七子八家推崇軒冕而忽意于山林閒曠與風人之旨適相刺謬今詩繫所載軒冕中人大半已見前志惟山林閒曠之士諸志率多缺如今備錄于右至顯宦間有遺者仍歸列傳如方輅照柳志補屠襄孫則附其曾祖應峻傳云過陞高志參張志字錫璜庠生嗜古績學順治己亥里中施仲芳陸嗣開續舉徵遠社推爲後來之雋性故坦易遇良讌

會必盡歡有晉人風年八十卒後裔式微詩文多散佚嘗與沈崒等分纂邑乘稱詳核云

姚大楨嘉興府吳志字亘山諸生少穎悟善屬文每客遊探佳山水不慕榮利有枕書樓詩餘百花詩梅花百詠諸刻

俞曾模浙江通志字存三諸生少好學家貧教授生徒一時名雋多出門下著五經講解諸子粹言而周禮纂注一書尤能闡明先儒旨要生平孝友因自勿失恃衰年言及母氏必痛哭失聲更注孝經以志慕焉

邵暉嘉興府吳志纂字白崖江西提學副使延齡子監生善詩古文著有德藏志畧九卷白崖詩集

胡慶豫張志叅陸堂文集字雖來號東坪歲貢生性醇謹學問淵博嘗輯四禮尊義一書曰非敢訓世用以檢身教家云爾少卽工詩古文客江西與毘陵邵子湘洪都彭元敘日相倡酬由京師入蜀入秦而歸詩益工著東坪詩集八卷杜詩集註十八卷弟觀字次咸康熙辛酉順天舉人丁父艱哀毀卒次恒次啓貞次復並諸生恒字晉三長於春秋啓貞字震初精易理能詩老而無後客死豫章復字見亭書法李北海黃涪翁早歿時稱胡氏五俊

周儒張志纂字宋傳歲貢生幼慧耽書枕籍經史爲張家漢高第弟子屢躋舉屋客燕臺數載終無所遇歸卒於家著有

平海縣志 卷九
交翠軒詩文集四卷刊行者歷試草一卷子二長夔字鄰臯
歲貢生次學海字紫廻諸生皆以能文世其家夔尤長詩古
文

陸光曙姚之揆高志叅張志光曙字東白廩膳生工制藝試
輒高等事母純孝母或詣弟所旦晚定省風雨無間讀書竟
日危坐無惰容行于市未嘗傍睨偶登舟解維卽發篋手一
編詠誦不輟弟光曾乙酉中式光曙是年亦擬魁以病不終
試論者惜之晚年崇信釋典瀕及貢忽棄諸生不就之揆字
東衡廩膳生規言矩行爲時楷模制藝幽折深摯能拔竒於
西江諸家外尤邃於經學康熙癸巳鄉試已定元忽病作不
竣事歸家竟不起刻有東衡四書文稿學者稱二東先生

俞欽竒高志字丹嶼號西野少竒偉好讀異書工詩尤長篆
籀隸書歷遊齊楚燕豫閩粵滇黔間與諸名士交抑塞磊落
之氣多見之於詩卒不得志以歸結茅城西之荻雪村嘯歌
自得芹廬近稿荻雪莊詩西野筆談衡素齋印譜

陸時杰高志字耳瑩號力夫增廣生少負竒氣稍長始折節
讀書工詩文駢體尤爲時重求者日踵門應之忘倦善持論
與人談前史事滔滔滾滾如置身其間者貧無後遺稿多散
佚僅存廣輿要覽百歲考二書

潘應奎張志字星伯號今尼生員負才不偶放意嘯傲詩從

香奩入手中年家日落而詩學益進蕭澹似韋左司刻苦又近孟東野浩如社中咸推翹楚陸瑋林懷星伯詩范叔寒如此綈袍不受憐荒村烟漠漠

古帖印田田客到柴門少詩從野老傳薄遊我已倦同上釣魚船

于東景高志字湯谷康熙庚子副榜少受業於兄東暹讀書

稽古隆冬酷暑不輟分隸故事不煩檢閱原委井井年踰七十問字者盈門酬答如響遇佳山水側帽微吟流連竟日著

述甚富有錦璇閣詩稿東暹字堯瞻生員工詩詞駢儷張奕樞錦

璇閣詩題辭夫子耽吟事當時自放歌老於聲律穩貧覺應酬多漢室饑方朔荆庭泣卞和不平鳴最苦展卷意如何

姚廷瓚高志叅橋李詩繫字述細號懶迂先世江南金山人

父姓字生始遷平湖與張帶三吳日千董樗亭輩飲酒賦

詩為忘形交所著有修竹廬稿廷瓚性豪邁亦工詩嘗構別

墅於所居西偏積書萬卷蒔花灌竹邀湖中諸名士結詩酒

社著有懶迂小稿鷓水偶吟耄學集塵瓿草吟艷諸編鐵蕉

詞

陸兢烈嘉興府吳志纂字懶真庠生有文名再試於鄉不售

遂棄制舉業避居南田烟舍栽花累石日與知己相倡酬詩

境幽秀高雅能拔幟于洛如社為湖中近代名家晚忽棄家

為僧名德衛字高造結廬墓傍日松在自稱栽松道人往來

雲林佛日間嘗自作生瘞詞及病革又手吟咏而逝著有停

雲擯影集洛如詩鈔陸奎勳雨中牡丹詩跋壬午春懶真拉

子同作牡丹主人遇甚雨各賦一詩錄于素扇雲

散風流傷心俱往其存者遊宦天涯踪跡難合懶真有激而
逃雍髮靈鷲竭來緘詩寄我有同此花時同此雨冷齋殘粥
過堂僧之句于以嘆綺序如馳勝游若夢江東步兵之達識
不以身後名而易及時盃酒我儕亦愈知嚮往矣丁亥季春
下

張培源高志參張志字江亭號蓴香監生父重芳能詩著有
晚閒集培源深得家學好書購宋元精刻積數千卷藏一樓
寢食其中體雖羸吟咏不輟卒年二十有六著有吟香詩集
四卷子雲錦有傳

俞永祺張志字星源歲貢生生平謹言行不妄色笑爲文遂
於古法以先民是程時制義訛駁矯之一軌于正康熙間汪
學使澐視學兩浙以嘉隆規範程士歲科五試三冠其曹居
恒執經就正者屢滿戶外年六十餘卒

張在霄張志纂字健凌恩貢生少穎悟至性過人父日焜以
宿學爲諸生師在霄遜志攻苦未弱冠餼於庠制藝根柢經
史父歿弟鍾秀尚幼課以實學後成名進士卒年五十二刻
有四書文稿鍾秀有傳

王觀成高志叅張志字元文號嘯園廩膳生幼有神童目學
使張希良面試七藝補弟子員性鯁直好濟人急鄰被火各
調以金多讀書善講貫凡天官地志律歷河渠叩之靡不條
析原委年四十七卒著有經解刪要四書粹言性理集說今
可軒制藝弟用錫錫嘏泰順用錫字廷獻以歲貢生任新城

訓導遂於易學錫嘏字元肅歲貢生與二兄齊名能詩泰順字健園弱冠舉于鄉

陸嘉孚張志叅當湖人文逸字仲萊貴州叅政祚蕃子恩貢生性洒落父雖貴顯而家徒壁立折節讀書不少挫志工制

藝尤善小品論者謂與金壇王步青相埒雍正丁未邑人盧生甫官刑曹郎以才守兼優薦部檄本籍起送有司臨催上

道援母老力辭家貧嘯歌自得授徒終老孝子張世昌兄弟

其弟子也著有四書文稿張世昌五松亭讌集呈仲萊詩師門逢舊雨好景得同攀簷對林梢

月春藏袖裏山但知詩入興不覺酒侵顏雅會情難極宵深未肯還張世仁輓仲萊詩廿年燈火奉清塵模範終期晚歲

親誰料杳然同鶴夢西風回首淚橫巾

葉之淇高志字右水號待堂監生候選州同知先世江南歙

縣人父寓當湖因家焉少負異才從陸閣學業遊與孫眉光

沈季友輩有蘇門四學士之目陸載崑倡洛如詩社偕其弟

之溶與焉著有寒碧齋詩五卷黃山遊草張志子映榴字柳

田生員亦能詩陸奎勳感舊詩五字唐音妙入神三升魯酒見天真江南何處無芳草絕憶風流鏡閣人

葉之溶高志叅張志字笠亭工詩古文與兄之淇齊名學使

李清植以人品端方薦乙卯又舉博學鴻詞省試被放士林

惜之著有小石林詩古文長短句小石林文外列國考年號

考廣輿摘韻長子鑾字筠客乙卯拔貢生官於潛教諭次子

諫字信臣監生並以能詩繼其家學諫著有漱潤齋詩鈔六

陸載崑張志纂字伯璣號漁滄檢討奎勳從子生員年一三
能詩長益工舉洛如詩社陸氏十二人益以親知十五人游
歷兩年得詩二千二百有奇詩以中晚唐人爲宗秀水朱檢
討彙詩選存六卷刻之雍正庚戌浙江修通志奎勳總裁
載崑亦與分纂後弟子金壇于文襄敏中視學山左延請校
文以疾卒于署從弟載霍字亞濤監生亦工詩

陸載紀張志字抱青號敦南檢討奎勳長子歲貢生幼好學
至老不倦寢食坐卧不離書堵見卽手錄成編工詩古文分
纂浙江通志廣西通志所至名賢倒屣母老歸養問字者無
虛日母病不脫冠帶者六旬及母歿日夜啼泣賦烏夜啼志
哀年七十二卒

劉錫勇高志字硯芬號蔬叟庠生博學多識詩文不屬草千
言立就自中繩尺生平友愛至老彌篤年四十餘喪偶不再
娶無子所著有待廬詩文集

沈燮張志字御李生員工詩遊金閭白門江右日下湖北黔
南凡山川草木奇聞壯觀咸以詩發之著有蓉湖詩鈔子天
達字驤九亦能世其家學

韓戴錦張志字貽孫號柘田生員詩宗晚唐兩宋諸家對客
揮毫千百言了無窘色著有寶墨齋詩鈔

馮承烈張志纂字孝移增廣生博學工古文詞康熙庚子鄉
闈已雋復失性孝友姪藻少孤撫養成立家貧好施與品行
純潔日取所作事書于冊曰質心集遇朔望則禱于神前焚
弟子暮年得軟脚病坐卧一樓精研經史尤熟于左氏傳嘗
做呂東萊博議著有左氏論說一卷及周禮論說若干篇
宋景濂張志字雙穎父炳奉母膳族以孝義稱景濂未冠入
學旋補廩膳生學詩於陸檢討奎勲學駢體於劉秀才錫勇
古文則私淑周宏起自成一家言性卞急中年與黃正色遊
薰陶涵養漸歸和平嘗踵李孝廉天植九山志作乍浦九山
續補志未成而目疾作遂輟業卒年六十正色字肇修踐履
篤實好養生家言乾隆壬午當充 恩貢患末疾不能赴試
以廩膳生終

唐起鳳張志字羽豐號九峰性英慧年十三卽能詩工楷書
弱冠領乾隆丙辰鄉薦屢上公車不得志遂絕意進取閉門
課子賦詩自適著有九峰詩草

陸天錫張志字畏蒼號青棠乾隆戊午舉人襁褓失怙母林
親授章句長而以能文名母歿痛不及祿養旋得心疾奉部
截取知縣不能赴旋卒年六十二生平交友以道義相切磨
晚境憔悴詩益雄健卓犖書法亦得晉人風致著有古香閣

詩集

陸祖錫高志纂字念劬天錫從弟父垣歿母林授以經書過目不忘弱冠受知學使王蘭生由拔貢充教習時梁文莊詩正在詞館奇其才遂定交詩文敏捷數千言立就尤善小楷得河東家法文莊贈詩有昭陵玉匣久塵遮新樣從君擅柳家之句終不遇後蘭生視學安徽招入幕旋隨入陝會舉博學鴻詞科蘭生即疏薦總督李衛嘉興錢文端陳羣亦交章薦之

廷試保和殿放歸惑烏伸術得心疾而卒著有松鱗集

張奕樞張志纂字掖西號今涪監生父崢歿同胞弟七人幼

纔四齡奕樞延師課之相繼遊庠性落拓工詩古文詞三赴

北闈不售交益廣學問益進歷遊秦粵閩晉楚借助江山所

著日富與諸弟友愛文行重一時著有芳莊紀遊詩八卷月

在軒琴趣二卷弟應璇字義傳生員事母孝母病博覽方書

親奉湯藥校刻陸清獻制義次第在璣字鳳攸增生屢試不

售刻有沁香居時文與兄同操選政有聲於時陸奎勳題掖西蒹葭書屋

圖詩秋宵愛聽讀書聲似鳳如龍好弟兄一望葭園烟水濶那能不動涓陽情

陸鍾英張志纂字舒霞晚號退士沈潛經史遂于詩古文尤

工制義乾隆辛酉舉人淡于仕進當事延主當湖書院講席

十餘年因材善誘品評悉當多士悅服里中有文社皆折衷

焉兄汝欽罷官歿宦橐蕭然鍾英分硯田所獲賙其孤寡教兩姪成名後奉部截取知縣辭不赴授書講學以老

高嵩張志纂字三臺號峻齋編修與子監生由

武英殿行走議敘州同知補江南山陽管河縣丞工書法蒼勁

秀逸其姊媚雲聞張文敏照嘗屬捉刀人莫能辨詩授自陸

太守綸得三唐遺意曾于任所賦落葉詩三十首為時傳誦

乞休歸日飲酒賦詩徜徉物外繪寒香晚節圖以見志年七

十無疾而卒著有簡靜齋集醒閣詩鈔若干卷盧譽士題寒香晚節圖詩

蔣徑重開日寒花帶露研苦吟憐杜瘦揮帖愛張顛峭舊松千尺清冷水一川頭銜知更好新署地行仙

馮重華張志字文彪號南屏家貧刻苦績學博綜經史乾隆

壬申年五十始領鄉薦性耿介不為翁翁熱人望其風采畏

之遇學古士輒傾心獎借為文典重有骨刻有敬業堂四書

文稿

張雲錦小石林文外叅張志字龍威號鐵珊監生少學於舅

氏陸奎勳工詩尤善咏物有紅葉詩奎勳賞之稱為張紅葉

淳安方婺如愛其春草詩贈詩曰楊春草後張春草他日應

將合傳傳一時名流如杭世駿厲鶚輩皆與訂交總督李衛

聘修浙江通志及西湖志乙卯舉博學宏詞科省試被放著

有蘭玉堂詩正續集二十一卷文集二十卷紅蘭閣詞藝舫

咏物詩及弄珠樓佑聖宮德藏寺諸志

馬恒錫張志纂字久庭號愛廬生員幼工詩澹於科名課徒暇以吟咏自適為人和易善引掖後進學詩者多師之著有古直廬集

馮錕張志字含輝號澹園少穎悟讀書過目成誦年十八補弟子員試輒高等癸酉拔貢棘闈屢薦不售操選政二十餘年所刊考卷墨卷同風錄風行海內問字者屢滿戶外授仙居縣教諭精勤督課士氣一新甫三月卒官歸櫬時諸生感泣有徒步送百里外者刻有歷試文編

孝友 按史傳孝友取其至性所激有足感天地動神明者邑境未析以前過孝子其最著已沈孝子琮載明史孝義傳序因已登仕籍統入列傳其餘被旌孝子及天性肫篤專以孝友著者始入孝友傳

元

過宗一分省人物考叅浙江通志字貫之父早喪獨與母居

至正十六年張士誠陷蘇州聞其才遣使迎之以養母辭尋劫以兵宗一負母逃海上猝與寇遇欲殺之以身蔽母面中數創乃舍而去既返益困傭以給食母卒六年不克葬寢苫服衰蔬食不變與人語輒泣下有燕巢其傍東西相向及葬燕不復來明初以事聞詔旌其門越百餘年有七世孫橋者號龍濱少而孤事嗣母至孝所得嗣產悉推與弟年四旬舉明經冠兩浙以母老朝夕承顏竟不赴廷試母病輒焚香刺股未逾年而終萬歷間與宗一建雙孝坊

按橋係明中葉人因雙孝坊之建故附宗一傳後

明

沈昊程志字孟璋珍長子侗儻有幹局性孝友奉諸母比於所生撫異母弟妹無間同母有弟孟暹以誣被逮昊挺身代行械至淮上會淮撫雅重昊一見大驚立奏釋之同逮者皆賴以免庭中嘗產瑞竹一本兩幹柯葉亭亭咸謂孝友之感時邑未析倡義捐建學宮事詳陸珪傳

沈燮嘉禾徵獻錄參朱志字泰夫號賓山天順時人父樵以資豪閭里獲罪論死燮徒步走闕下抗疏訟冤拘囹圄者八年疏七上乃得請而歸甫至吳門計詰且獄且決號泣祝天

大風忽起一夕抵武林雨甚燮虞辨揭之朽也頂黃袱懷綿

紙百張爛輒易之巡按感其至性減父死流嶺表後以赦還

人稱燮為孝子

布政使萃楨樵五世孫

郭球程志參樵李詩繫字友虞母陳氏蚤孀兩目皆瞽球以

舌舐目漸明嘉靖間倭入寇負母逃中塗寇至欲刃其母球以手搏之兩臂受刃血濺襟裾會縣尉率兵至突圍而出母亡廬墓朝夕哀慟有烏數百巢其樹人以為孝感天啓間詔旌之有舜鳴集孫紹儀有傳

俞永言程志參朱志字懋孝馬湖知府南金少子諸生南金早世生產蕭然與兄敷言篤志績學自相師友母病皇皇醫

禱願以身代母亡以兄為家督事無大小稟命唯謹兄嫂繼歿撫姪不異已子教育成立

沈思孝程志諸生家貧竭力孝養父患疽口吮之立愈母瞽斯夕籲天日復明母亡會葬大雨如注禱城隍廟遂霽克葬人以為孝感所致

秦涇嘉興府劉志字汝清幼喪母哀毀不勝服除像事之如生及事繼母失愛涇事之益謹撫異母弟尤篤卒回母心父卧病鄰火及卧所涇扶鼻莫及叩頭籲天風返火滅父歿廬墓終喪知府鄭登高以聞未報而卒按程志作繼母病朱志本府劉志改為父病今從之

楊志英朱志邑生母吳沉疴數載侍湯藥衣不解帶母既歿哀毀骨立終歲偕父寢非再三命不就私室家貧同婦食糲供甘旨館穀悉進父疾溺器穢衣手自澣滌在疚之日哀號嘔血感動鄰里後無疾端坐而卒程志英嘗遇異人授養生法亦精岐黃術至老

善飲嗽無疾一日晨起盥櫛畢曰吾逝矣遂卒

俞懋修理庠生少有疇疾父母嫌之娶婦戈頗令淑而嫂酷妬百計搆之父母愈不憚乘父出挾姑威錮兩人別室絕其飲食伯母姚陰佐兩人出僑寓武塘集里中兒授句讀婦縫紉以支旦夕顧時時念父母不置相對欷歔曰寧死膝下耳懇族人為請於父父稍悟得返母亡嫂筭家政進食皆粗

糲父不堪下箸懋修與婦更烹鮮以待尋爲一後常迎養父
父益悟欲奪兄所侵嗣產歸之懋修號泣牽裾陳不可亡何
父與兄嫂相繼亡懋修擇地築土并兄嫂祔葬於旁兄子多
外侮力庇之兄子死撫孤寡倍至子允昌語及父母事輒泣
然流涕

馮伯禋朱志字欽仲敏劾次子萬歷丙午應天舉人少稟至
性嘗斷指療母疾本生母沈卒伯禋嗣叔父敏劾例不守制
泣曰伯禋何忍獵名忘母遂不赴舉嗣父沒後當析產則曰
爲人後者以苦塊爲市乎不受與兄伯禎友愛甚篤撫孤姪
不啻己子著有虛舟蓬門諸稿

毛應銓程志分省人物考字元衡號念軒萬歷甲午舉人
幼有至性家貧父病晨起赴塾必以父藥餌絮語家人灑淚
而出暮歸同父卧抑搔疴癢衣不解帶事母如事父朝夕承
顏務得歡心爲諸生時凡館穀所入悉以與兄丁母艱廬墓
三年哀毀骨立謁選署安吉教諭以德誼相矜飭陞國子監
學正遷禮部司務仕宦十年居無一椽至老猶與兄同居不
分析子湛有傳

馮洪業浙江通志參朱志字茂遠萬歷己卯應天舉人性至
孝父伯禮卒于燕洪業徒跣奔喪扶柩歸事母查氏能養志
母卧樓燬冒烈焰負母出眉顙並焦母疾劇指以療里中咸

稱孝子所著有易美睡庵六書又嘗集古今成編分類纂次
日耘廬彙箋凡千有餘卷未及刊而卒

朱志洪業世家子豐于財嘗營北郊別墅

日耘廬疏池築山林木幽勝中構曲房遂閣百十間引水環之內貯家姬外集名士日賦詩飲酒其中望者以為神仙性尚義輕施與嘉平二邑學宮圯各捐千金助鼎新費又捐田惠宗族供祠祭修築漢塘五十里行旅便之他如賑饑療疫舍櫬積衣帳不可勝計晚好養生與前御史郭紹儀講修煉術

按朱志洪業原傳似文苑尚義皆可列然九山志載其禱

雨遇龍姚士遴有孝子端能起孝龍之句趙維寰龍湫記

亦稱洪業為孝子是其純孝素著因先其重者列孝友傳

曹伯來嘉興府袁志少負雋才九歲喪母事父孝父歿妹纔

數月撫育遺嫁踰於已女兄沒遺貲厚無嗣伯來仲子應繼

覘嫂意他屬欣然讓之及嗣子中落歲具薪米贍嫂以終其

身朱志伯來嘗道經平望客玉姓者風覆舟伯來以舟援之亟棹去追贈千金弗受雀識乙榜者四竟以諸生終

按伯來事嫂尤人所難可以愧世之奪嗣爭產者

陸倣孟朱志字泗臣邑生營父窀窆於馬鞍山按張志作龍尾山誤為

豪所發倣孟雍髮毀形誓不俱生獄具後讞駁漸減倣孟伏

闕抗疏詔下法司案驗得實置豪重辟人稱為陸孝子乍浦志子

雲林字次飛邑生康熙庚午鄉試擬元塲中火發焚其卷竟不售云宋景闕者舊詩佳城既下絳豪暴何椎埋火棺擲骸骨孝子為心摧春秋大復讎伏闕纖渠魁馬鬣不再封鳥革空高鬼茫茫雲濤濶何處魂歸來

陸士鉉朱志字古雪八歲能詩性至孝母喪水漿不入口以

歲薦授訓導甲申聞變大慟絕粒死有蠹啣餘集

按士鉉朱張兩志編忠節今忠節不另列門士鉉又未登仕版按舊志稱訓導不著何邑當是訓導銜未及授任觀樵李詩繫作歲貢生可証不應附列傳中因其少以孝聞改列孝友

顧之琦朱志邑生父其志卧病三載之琦侍湯藥寒暑弗歸私室父歿哀毀不食者三日歲乙酉被兵母曹氏年八十五艱於跬步之琦守母不去身被數創而卒

國朝

湯自梁朱志字維京順治丙戌舉人年十二母沈病割股肉入藥乃愈家人無知者久之痴露父紹祖戒之曰非中道也然心愛之伯兄茂先遺孤在襁褓撫之成立仲兄元纘喪明

歲奉薪水以贍鄉黨義之

金赤朱志字如斗市井人事母孝家貧竭力甘旨進必手奉母意有不懌即長跪請罪命之起不敢必得母一笑乃起當長跪時鄰里顧視竊笑赤自若也有二女母以意字人而其家貧甚不能舉火赤戒其女終身無怨言

沈心培張志字存齋庠生父熙性嚴卞雖晚年舉子不少姑息心培受室後猶時受杖里黨稱純孝敦行力學試必前茅家貧授徒以奉親遭母喪大慟嘔血不止而歿年三十四

徐昱嘉興府吳志字耘中庠生父署丞振歷尚義好施致赤貧昱性純孝勤苦供親父病籲天割股及歿哀毀屢濱於死

母患脾症晝夜侍躬滌垢穢延醫墮水聞神人呼救孝子負土築墳十指俱裂撫兄子踰於己子年七十餘無病端坐而逝

沈之銳嘉興府吳志字鈞奏父明經起雷沒于徐溝訃至之銳哭而疑遽踊身欲飛竟入水救起成癡病父柩歸癡少間云母在未從父於地下及母病衣不解帶者七十日母亡號哭不止忽失聲仆地血淚染衣襟袖俱深赤左目遂失明曰吾得侍父母矣勺水不入口旬日卒

屈希平嘉興府吳志纂字又原諸生父思恩卒希平甫弱冠居喪盡禮既葬廬墓三年母歿亦如之事兄以恭一邑咸推

孝友雍正丁未以孝子題 旌

按浙江通志又稱希平周恤族黨無倦色水旱出粟賑濟冬月施襦死不能斂者施槨云云因入義行門然係

勅旌孝子自當列孝友傳

王棟浙江通志叅張志字旣昌監生年十二遭母喪呼搶號泣父病躬親湯藥衣不解帶者彌月日禱神前願以身代及歿哀毀骨立死而復甦盡力殯葬廬墓三載又善事繼母與弟穉不析爨視姪如子雍正丁未以孝子題 旌

張友德浙江通志字淡中貢生誠孝事親色愛靡間親病躬嘗湯藥及卒哀毀骨立廬墓三載有木成連理之祥每遇忌

日號泣若居喪仲兄出繼以本生產業義讓子姓貧乏者曰
是我先人所遺也閭里稱焉以子逢年贈知府

陸圻嘉興府吳志字近虞庠生父母歿年十五圻率弟四人
日聚一樓苦志力學相繼入庠叔士琰歿于京師叔母滯山
左圻扶柩奉叔母歸經喪卹寡不憚拮据爲諸弟擇配成婚
自憾失養終不娶

胡光銓高志字以鈐號衡臣監生幼喪父母哀毀如成人既
葬日則歸家奉侍祖母晚奔廬墓下一邑稱孝子捐祭田爲
合族倡有叔病劇以子女託之光銓悉心教養歷年產所入
爲廓置田畝婚嫁畢并所贏餘籍以授焉子紹高紹安有傳

楊大琮張志字紹春髫年失恃色養繼母陸盡孝繼母病常
在床褥大琮衣不解帶顙天願以身代卒不起一慟幾絕嗣
是遂得怔忡疾比鄰失火延燒家人悉逃避大琮撫棺長號
誓俱焚火騰屋旋息人謂誠孝所感未幾以疾卒年二十八
王瑞林張志纂目不識書負販養親母病醫藥罔效割左股
以進得瘳未幾父病復思割右股或謂年邁非股肉可救宜
嘗糞糞苦則生乃伺父便取嘗味甘惶遽無措親歿復歲禋
倪進士見龍賻其喪瑞林感激後倪作令註誤徵及家屬瑞
林請代訊或誦之則曰吾以報葬親大德也雖死不怨繫獄
數載乃得歸年八十餘卒

馮錡張志字爾調生有至性父堦候選州同知容死大同幕錡聞號泣奔訃既至一慟幾絕勺飲三日不入口雲中目為

馮孝子扶櫬歸徒步走數千里遇崎嶇必號泣扶挽櫬行例不入旅店每夜露宿柩旁既歸葬一慟而絕乾隆癸亥以孝

子題 旌子溥為刊孝蹟編秀水許宏士題孝蹟圖詩孝子無涯痛亡身總為親性天言不

盡圖歷古今春錢塘陳兆崙詩輟吟久矣謝朋箋飲啄餘生劇可憐今日披圖重泚筆淚和慙汗落霜天

按前志孝友傳率至百數十人之多閱其傳文或溫靖定

省套語或僅有性孝友一語而所敘多文苑尚義諸事于

分門之意殊乖蓋從前修志時子孫欲表揚其祖父備敘

懿行具呈載筆者無從分別輕重畧加節改隨意列入孝

友尚義各門以至舛錯殊多貽譏大雅恒自開局一秉至

公與邑士大夫約人物必百年論定惟前志已載不忍遽

削若新增非沒世八九十年行事已見紀載者不敢濫登

留俟日久重纂用昭詳慎是以孝子張世昌素行久孚輿

論業經紳士公舉呈縣恒查核明確于戊申冬申詳上憲

已蒙題請 旌表顧其去世距今僅十有九年亦不復破

格纂入以歸一例因列孝友傳而詳著其說俾異日閱者

知被旌之人未為立傳非纂修時脫漏耳

尚義 按明有勅旌尚義之例邑陸宗秀輸穀賑饑詔書褒美閭里榮之其後好善樂施代有其人因擇其

義舉之有益鄉黨者標為尚義門而以義友義士並列其中寓激勸微意

明

沈珍朱志字穀瑤其先居烏程馬要鄉避難來海上高皇帝師過樵李輸穀百石充餉帝登極布衣赴闕上興利除害十事帝稱善賜食授以職不就年七十一卒蕭山魏文靖驥銘其墓

陸宗秀分省人物考參程志宋樞密副使旋吉九世孫爲人敦樸有至行與弟宗達宗俊友愛最篤永樂甲辰應賢良詔與陳繼等二十三人徵至京師會仁宗新御極引見于便殿宗秀方巾布袍上異其禮貌命至展前問曰如何則天下太平宗秀頓首對曰皇帝親賢納善大臣秉公持正自然太平

上悅曰好言語公卿在列者皆悚然既出大學士黃淮問先生何字對曰小民名實字宗秀里中謬以字行淮嘆其言動合禮留京師月餘以疾辭賜寶鈔銀幣還正統五年歲大稔出粟麥二千九百餘石助賑事聞賜勅書褒美表其門曰尚義子珪有傳

孫佐鍾鳴遠潘璧嘉興府劉志正統五年歲饑佐等與陸宗秀同時各出穀麥二千石助賑有司上其事朝廷勞以羊酒旌爲義民復其家三年其勅語俱與宗秀同

陸平兩浙名賢錄字國平平生好施處事有斷里有訟者爭就質言出而解洪熙改元歲大歉民食草木平盡免所貸錢

平海縣志 卷九
穀作粥以食老弱餓者多全活正統壬戌至景泰乙亥屢饑
前後入粟五千餘石麥八百斛佐有司賑濟詔旌爲義民表
其宅入京謝恩賜宴光祿寺授教官

按程志云陸國平初名國上嫌之賜改國平朱志以下因
皆作國平與孫佐等三人合傳惟省志則爲專傳稱陸平
今從省志

江濟朱志字伯與宋丞相文忠萬里之裔正統五年命臺臣
領勅督各省布按府州縣置預備倉勸民能出粟佐官者旌
其義復其家濟傾家得粟二千一百五十餘石輸官事聞璽
書褒獎表其門曰尚義勞以羊酒入謝賜宴奉命建勅書樓

于江灣

按兩浙名賢錄陸平世居海鹽省志及嘉興縣志皆以江
濟爲嘉興人然舊志相沿已久而邑以尚義祀者有二人
木主則其爲邑人當必有據

屠機嘉興府柳志字汝敬別號竹軒歲饑兩輸粟賑濟例得
仕者階服輒辭弗受兄子煥從戎于燕年五十無子以書諭
曰汝父不絕者在汝宜歸續汝祀煥歸爲葺室割田與之嘗
雪夜過淞湖聞葦澤間有嗚嗚聲棹往視之乃一人手足被
縛命舟人負至舟解其縛易故衣以火溫之久而始蘇知爲
句容商人徐甲爲盜所劫食之踰月愈而歸以百金酬不納

以子勲贈刑部尚書勲有傳

陸珪程志叅兩浙名賢錄字廷玉宗秀長子性好義有父風嘗代輸一邑賦以寬民力景泰六年饑疫珪與弟瑜給穀種施糶積以千數明年又饑復與弟瑜瑜瑾共出穀五千餘斛賑之有司上其事詔授珪迪功郎兄弟四人皆賜宴光祿珪以德義著於鄉鄉人有不平事皆就取直不至官府邑初建學宮珪與沈昊共任之大成殿成邑令羅榮酌酒祝曰願爾家世世衣冠不絕其後陸之孫淞沈之孫肆俱發解至今科第甲于一邑云

俞錦程志字克美性好義以古人自期姪彬貧析產過於已

子故人金杰死無以殯其子坤來鬻田計所需給之焚其券張輅儲敬十餘家藉錦舉火嘉靖間築城署縣事殷廷蘭以其居當城趾欲廣數丈全之錦曰何等時廼以一人居煩縣官費乎竟自毀庭寢二十餘間郡守劉慤顏其門曰義門張濤程志字悅清多隱德娶婦盲相敬如賓蘆瀝場官逋二百金繫郡獄濤代償之越人駱某好學而貧以勾軍匿濤所濤護之遂入陝中鄉試歸以百金壽不受友人趙端嘗貸于濤償時攜七歲孫漢以往濤器漢歸所償金佐讀書後漢任諫議執子姪禮終其身孫熒有傳

曹臬朱志少業儒家貧館于某家忽夜有叩門聲則處子也

平海縣志 卷九
臬拒不納明晨以他故辭族兄校以貢仕光祿丞家富而耄
托臬司計四十年許尺帛分錢犁然不苟弟早亡遺女臬厚
嫁之舅氏死臬調其嫠孤里中咸推長者

韓文朱志字本質起掾史授羅浮倉官前官逋糧久繫獄文
歎曰三十金關一家命盡出所攜資償之遂得釋文六十無
子南雄太守貢珀贈詩曰捐金不惜緣無子垂老猶忙爲有
官此意只教知屋漏老天曾肯竟漫漫後果生子相任通判
贈文如其官年八十餘卒

陸序朱志字可松爲黠者所中坐死得雪黠者坐他法序更
爲排解黠者愧服出粟千石賑饑上聞授序七品秩子槐有

傳

馬瑀程志字朝儀性慷慨好義弟珣運漕覆糧多傾家償不
足部使者按治瑀以身代白得免周邑令廉平大猾許以私
苞苴萬計瑀上書當路侃侃數千言得不坐歲大禱民多流
徙瑀固請于郡免今年田租卒減其半會貢瑀以次當貢或
謂先陸某未至可得瑀不應卒貢陸館兩峯黎令署中二年
絕不干以私及後贈叅議子千乘孫維銘曾孫德澧皆有傳
陸壘朱志字載民博學隱居家不甚饒慷慨好施值歲饑宗
人賴以舉火戚里亦多所仰給至鬻產不恡有司奏旌其義
陸基誠朱志字存卿生員重義氣戊子大饑悉發儲蓄以餉

族戚徧擇五父之衢爲糜粥以食饑者復設冢市樁橫收瘞路殍度大疫後必疫劑藥餌以待已而果疫人賴以全

沈維錡程志字震躬生員少有大志嘉靖丁巳倭警總督胡宗憲設計誘降厚禮聘維錡維錡慨然曰此我見奇時也時倭巢沈莊勢若負嵎衆莫敢入維錡獨往說之倭欣然請降已大兵四集盡殲之維錡實首功督府欲疏請大用維錡志在科第不欲以軍功顯固辭督府壯而許之但奏免沈氏十年田稅

陸瑞銓舊浙江通志叅朱志號宇平諸生父傳教少膺多難勵志砥行瑞銓性好義值歲荒平糶煮粥全活甚多族指繁

衍或不能舉火捐田六十畝入宗祠以分給之故人子有零落者輒爲收錄毘陵舊族有母子漂泊至湖鬻身者捐金贖之子之祺官河南布政使時瑞銓及其父封贈如其官

倪虬嘉興府袁志字六元高才善吟咏負氣節先是邑中徭無定編正差雜泛率脫豪右而科貧弱虬獨慨然釐剔爲民請命臺司善所陳條議著爲令甲湖民便之湖邑邑乘虬與分輯著雲林集新安三楚記遊藏于家

張冲元高志參雅坪文集字完初性誠樸嘗至湖州城以物付質庫主者誤授三百金歸家發篋得之復拏舟往湖還其主主者欲分半與之固辭不受後家漸饒崇正辛巳大饑出

穀千餘石助賑遠近全活建始祖忠獻祠于蒹葭園捐置祭田族人高其義以季子治洪贈鴻臚寺序班長子長生庠生鄉飲介賓敦龐謙素有父風家雖豐不屑屑計生產逋其租課者置勿校晚歲棄舉子業綜覽諸子百家書與人言恂恂若無若虛閭里稱長者

按冲元係萬歷間人舊志皆列

國朝人物以其曾受封也今封贈及祠祀兩門皆仍舊志傳文則更正

曹鐘鳴朱志字洪聲咸屬朱存吾以腴產典鐘鳴五十金後請售鐘鳴曰子賴此餬口苟屬我子何以生不索金而歸其

券

國朝

劉濰恒朱志字滌凡海鹽邑生乙酉秋邑被兵僵屍滿湖道路相枕藉濰恒偕姪棕率僕從收瘞至一千四百三十七人時湖畔無行舟炎穢蒸灼濰恒竟日往還無所忌憚軍聞其義欲上聞旌獎力辭

陸淪原朱志叅嘉興府吳志字嗣暢號岫丹歲貢生少有文譽兄清原殉難後獨居蕭寺枕席皆淚痕年三十八妻亡不更娶旁無妾媵崇正間歲大饑民洶洶思亂淪原請于邑令勸巨室減價平糶民心乃定晚年為臨安訓導時功令嚴逋

稅諸生貧者淪原出俸錢代完得免奏銷邑令奉檄造戰艦
多科派淪原持正觸令意中以考功法罷歸

李慶乙九山續補志叅張志字秋水天植從孫少孤貧勤學
入海鹽庠後投牒罷諸生改名杜字龍門種菊數百本做月
令考功記著菊經友人郭襄圖為仇家所持墨吏檄下獄將
中以危法慶乙經紀其家中夜扁舟出入險阻數瀕殊死急
其難郭亡命出走吏督慶乙撈掠之下之獄戒獄卒偵所與
勞苦人主名禍且延及慶乙裹創僵卧獄中不為動會有謀
釋慶乙者得歸歸三日卒給諫馬培原銘其碣曰義友李君
之墓馬廣軫挽秋水詩天地存正氣慷慨見友生嗟哉左儒
死杜伯先九京而况智勇兼孔褒與王成以是壯秋水

結交在滄瀛自許天下士李郭同堅貞何圖曾參杼橫臂公
冶術羔羶工鍛鍊豺虎快信傳交遊盡屏跡親串徒吞聲惟
子慨以慷橐籩納愚誠罟觸泰山壓軀委鴻毛輕張儉無死
地范滂豈生榮三木酬廣柳一笑歸柴荆貧歛黔婁骨誅易
柳下名已遺將母粟為爾及泉羹誰言友朋
淚不霑宿草菁他年立孤日下報有程嬰

倪鍾瑞朱志叅西野筆譚字青翟號吉甫明萬歷戊午舉人
性好義嘗有人夜匿其家家人羣叱之使出鍾瑞曰不可是
必有迫而致之者徐詢之知為追呼所迫遂代之完納且厚
贈之感謝而去鄉隣有羣兒盜其園笋鍾瑞見之乃市笋遍
送各家且曰可徑來取毋使郎輩驚惶也眾議濬河而限于
貲欲其僕轉達僕不從互相詬詈鍾瑞聞叱退其僕徐語曰
門前河吾家事也而煩諸君用心耶令其僕向各家負荆以

錢分給歡呼載道其仁厚類如此晚年延陸清獻至家訓子

淑則與清獻相得甚清獻嘗以其言筆之隨記云年九十餘

卒淑則有傳陸稼書先生年譜先生與吉甫談論有足垂教

斷不可出諸口嘗記承則戒人曰莫道是詼諧其實是輕薄此至言也况在我無心之言或犯人所忌便恨不能忘嘗見朋友往往有以此成隙者甚可懼也中正之士一涉詼諧人便輕忽其亦何取于此哉亦有靜穆之士見眾詼諧便為效顰不知守吾靜穆未嘗不可見重於人何必學此輕薄乃為和眾耶又云人之作孽莫甚於口我聞人多矣見言語尖酸者罕有不逢天譴如縣西中丞公之後賢否不一今其子孫顯者其祖父皆木訥者也惟某最利口而今已絕矣其之無後也其亦由此乎故人惟若拙若訥為貴即真訥真拙亦何病乎吾在二十年前見能言者常自恥不如自今思之亦正賴其不如也又云聖人論孝曰色難當親心與已有不合之時色為尤難孝道至廣凡一舉一動不合於理為人所嫌詬及父母甚可懼也又云昔趙漸齋乘轎出至時家灣偶觸一秀才其人大罵漸齋從容敬謝之罵猶不止從者皆不能平

漸齋惟自謝過而已後數日罵者犯人命漸齋聞之曰吾累之矣使吾稍與之計較其人當自戢不至於此先生曰可見惟知含忍猶非盛德事盛德者必和顏色至誠以教誨之又云施存梅為諸生時村居讀書嘗以糖食粉團誤蘸硯墨食竟面盡墨不知也先生云此雖不可為訓然亦可想見前輩用心之專

許默橋李詩繫叅張志字鳴一少穎悟館于茗溪受知學使

谷霖蒼遂為湖郡庠生年四十喪耦繼娶馬氏初入門情緒

慘淡詰之再三乃云前夫尚存特鬻身償逋耳急令攜歸不

索其金口占一詩以送有好守糟糠到白頭之句與趙璜為

詩友邵延齡為刊當湖兩山人吟稿卒年八十二

馮秉恭酬鳴一詩耽

詩多逸興談笑玩當時絕唱旗亭句輕舟剡曲思交遊無俗物老病得相知待我磻溪上垂綸正未遲

楊林高志字漢林力行善事建東湖木橋七處今之石梁皆

其經始也又濬城河自東水門至馬家灣以便民邑有匠班
錢糧匠戶子孫久苦株累康熙丁丑林奔請上官詳題將全
浙所科徵者悉併入條鞭宿累頓除知縣王瑋碑記有義民
楊林之褒華亭大司農王日藻採入編年遺事題其塋旁小
菴曰餘慶

張崢浙江通志字如岡九歲居父喪晝夜號泣如成人母歿
擗踊投地絕而復甦補邑庠生益以道義自守輕財利重然
諾族黨中有緩急傾橐濟之戊子己丑間水旱出米數百石
設糜粥以賑之復廣施丹藥以療疫痢全活無筭年四十歿
聞者嗟悼

